

מלאכי - ללא ניקוד

[א](#) [ב](#) [ג](#)

מלאכי פרק-א

{א} משא דבר יהוה אל ישראל ביד מלאכי **{ב}** אהבתי אתכם אמר יהוה ואמרתם במה אהבתנו הלוא אח עשו ליעקב נאם יהוה ואהב את יעקב **{ג}** ואת עשו שנאתי ואשים את הריו שממה ואת נחלתו לתנות מדבר **{ד}** כי תאמר אדום רששנו ונשוב ונבנה חרבות כה אמר יהוה צבאות המה יבנו ואני אהרוס וקראו להם גבול רשעה והעם אשר זעם יהוה עד עולם **{ה}** ועיניכם תראינה ואתם תאמרו יגדל יהוה מעל לגבול ישראל **{ו}** בן יכבד אב ועבד אדניו ואם אב אני איה כבודי ואם אדונים אני איה מוראי אמר יהוה צבאות לכם הכהנים בוזי שמי ואמרתם במה בזינו את שמך **{ז}** מגישים על מזבחי לחם מגאל ואמרתם במה גאלנוך באמרכם שלחן יהוה נבזה הוא **{ח}** וכי תגשון עור לזבח אין רע וכי תגישו פסח וחלה אין רע הקריבהו נא לפחתך הירצך או הישא פניך אמר יהוה צבאות **{ט}** ועתה חלו נא פני אל ויחננו מידכם היתה זאת הישא מכם פנים אמר יהוה צבאות **{י}** מי גם בכם ויסגר דלתים ולא תאירו מזבחי חנם אין לי חפץ בכם אמר יהוה צבאות ומנחה לא ארצה מידכם **{יא}** כי ממזרח שמש ועד מבואו גדול שמי בגוים ובכל מקום מקטר מגש לשמי ומנחה טהורה כי גדול שמי בגוים אמר יהוה צבאות **{יב}** ואתם מחללים אותו באמרכם שלחן אדני מגאל הוא וניבו נבזה אכלו **{יג}** ואמרתם הנה מתלאה והפחתם אותו אמר יהוה צבאות והבאתם גזול ואת הפסח ואת החולה והבאתם את המנחה הארצה אותה מידכם אמר יהוה **{יד}** וארור נוכל ויש בעדרו זכר ונדר וזבח משחת לאדני כי מלך גדול אני אמר יהוה צבאות ושמי נורא בגוים :

מלאכי פרק-ב

א ועתה אליכם המצוה הזאת הכהנים: **ב** אם לא תשמעו ואם לא תשימו על לב לתת כבוד לשמי אמר יהוה צבאות ושלחתי בכם את המארה וארותי את ברכותיכם וגם ארותיה כי אינכם שמים על לב: **ג** הנני גער לכם את הזרע וזריתי פרש על פניכם פרש חגיכם ונשא אתכם אליו: **ד** וידעתם כי שלחתי אליכם את המצוה הזאת להיות בריתי את לוי אמר יהוה צבאות: **ה** בריתי היתה אתו החיים והשלום ואתנם לו מורא וייראני ומפני שמי נחת הוא: **ו** תורת אמת היתה בפיהו ועולה לא נמצא בשפתיו בשלום ובמישור הלך אתי ורבים השיב מעון: **ז** כי שפתי כהן ישמרו דעת ותורה יבקשו מפיהו כי מלאך יהוה צבאות הוא: **ח** ואתם סרתם מן הדרך הכשלתם רבים בתורה שחתם ברית הלוי אמר יהוה צבאות: **ט** וגם אני נתתי אתכם נבזים ושפלים לכל העם כפי אשר אינכם שמרים את דרכי ונשאים פנים בתורה: **י** הלוא אב אחד לכלנו הלוא אל אחד בראנו מדוע נבגד איש באחיו לחלל ברית אבותינו: **יא** בגדה יהודה ותועבה נעשתה בישראל ובירושלם כי חלל יהודה קדש יהוה אשר אהב ובעל בת אל נכר: **יב** יכרת יהוה לאיש אשר יעשנה ער וענה מאהלי יעקב ומגיש מנחה ליהוה צבאות: **יג** וזאת שנית תעשו כסות דמעה את מזבח יהוה בכי ואנקה מאין עוד פנות אל המנחה ולקחת רצון מידכם: **יד** ואמרתם על מה על כי יהוה העיד בינך ובין אשת נעורייך אשר אתה בגדתה בה והיא חברתך ואשת בריתך: **טו** ולא אחד עשה ושאר רוח לו ומה האחד מבקש זרע אלהים ונשמרתם ברוחכם ובאשת נעורייך אל יבגד: **טז** כי שנא שלח אמר יהוה אלהי ישראל וכסה חמס על לבושו אמר יהוה צבאות ונשמרתם ברוחכם ולא תבגדו: **יז** הוגעתם יהוה בדבריכם ואמרתם במה הוגענו באמרכם כל עשה רע טוב בעיני יהוה ובהם הוא חפץ או איה אלהי המשפט:

מלאכי פרק-ג

א הנני שלח מלאכי ופנה דרך לפני ופתאם יבוא אל היכלו האדון אשר אתם מבקשים ומלאך הברית אשר אתם חפצים הנה בא אמר יהוה צבאות: **ב** ומי מכלכל את יום בואו ומי העמד בהראותו כי הוא כאש מצרף וכברית מכבסים: **ג** וישב מצרף ומטהר כסף וטהר את בני לוי וזקק אתם כזהב וככסף והיו ליהוה מגישי מנחה בצדקה: **ד** וערבה ליהוה מנחת יהודה וירושלם כימי עולם וכשנים קדמניות: **ה** וקרבתני אליכם למשפט והייתי עד ממהר במכשפים ובמנאפים ובנשבעים לשקר ובעשקי שכר שכיר אלמנה ויתום ומטי גר ולא יראוני אמר יהוה צבאות: **ו** כי אני יהוה לא שניתי ואתם בני יעקב לא כליתם: **ז** למימי

אבתיכם סרתם מחקי ולא שמרתם שובו אלי ואשובה אליכם אמר יהוה
צבאות ואמרתם במה נשוב: **[ח]** היקבע אדם אלהים כי אתם קבעים
אתי ואמרתם במה קבענוך המעשר והתרומה: **[ט]** במארה אתם נארים
ואתי אתם קבעים הגוי כלו: **[י]** הביאו את כל המעשר אל בית האוצר
ויהי טרף בביתי ובחנוני נא בזאת אמר יהוה צבאות אם לא אפתח לכם
את ארבות השמים והריקתי לכם ברכה עד בלי די: **[יא]** וגערתי לכם
באכל ולא ישחת לכם את פרי האדמה ולא תשכל לכם הגפן בשדה אמר
יהוה צבאות: **[יב]** ואשרו אתכם כל הגוים כי תהיו אתם ארץ חפץ אמר
יהוה צבאות: **(פ) [יג]** חזקו עלי דבריכם אמר יהוה ואמרתם מה נדברנו
עליך: **[יד]** אמרתם שוא עבד אלהים ומה בצע כי שמרנו משמרתו וכי
הלכנו קדרנית מפני יהוה צבאות: **[טו]** ועתה אנחנו מאשרים זדים גם
נבנו עשי רשעה גם בחנו אלהים וימלטו: **[טז]** אז נדברו יראי יהוה איש
אל רעהו ויקשב יהוה וישמע ויכתב ספר זכרון לפניו ליראי יהוה ולחשבי
שמו: **[יז]** והיו לי אמר יהוה צבאות ליום אשר אני עשה סגלה וחמלתי
עליהם כאשר יחמל איש על בנו העבד אתו: **[יח]** ושבתם וראיתם בין
צדיק לרשע בין עבד אלהים לאשר לא עבדו: **(פ) [יט]** כי הנה היום בא
בער כתנור והיו כל זדים וכל עשה רשעה קש ולהט אתם היום הבא אמר
יהוה צבאות אשר לא יעזב להם שרש וענף: **[כ]** וזרחה לכם יראי שמי
שמש צדקה ומרפא בכנפיה ויצאתם ופשתם כעגלי מרבק: **[כא]** ועסותם
רשעים כי יהיו אפר תחת כפות רגליכם ביום אשר אני עשה אמר יהוה
צבאות: **(פ) [כב]** זכרו תורת משה עבדי אשר צויתי אותו בחרב על כל
ישראל חקים ומשפטים: **[כג]** הנה אנכי שלח לכם את אליה הנביא לפני
בוא יום יהוה הגדול והנורא: **[כד]** והשיב לב אבות על בנים ולב בנים על
אבותם פן אבוא והכיתי את הארץ חרם: **(פפפ)**